

Prome Minister Mike Eman

Deliberando cu ehecutivonan halto di NACO riba Gateway Aruba



Riba e potretnan por mira Prome Minister Mike Eman hunto cu miembronan di gerencia di NACO Rik Krabbendam y Ben Hasselman.

DEN HAAG/ORANJES-TAD -- Pa Netherlands Airport Consultants (NACO) tin un cantidad grandi di oportunidad den Latino-America. Minister President Mike Eman y gerencia di NACO durante nan deliberacion tabata mesora di acuerdo cu e ponencia aki. E empresa cu tin un envolvimiento estrecho den e maneho di proyecto pa loke ta ampliacion di Reina Beatrix, ya for di hopi aña caba ta fuerte-

mente presente den Medio Oriente y Asia. “Nos ta mira un transferencia pa Latino-America, pero nos ta mira esaki cu hopi reserva. E ta pa nos un luga desconoci y e idioma ta un otro punto pa tene cuenta cun’e.

E ta un luga dificil pa drenta. E ta tambe inmensamente grandi. Unda bo ta pisa tera?”, un pregunta cu director Business Development Ben Hasselman a haci su mes.

Prome Minister Eman no mester a pensa dos bes riba e contesta. “Na Aruba. Eynan bot a pisa tera. Nos proposicion na bo ta: Habri un oficina na Aruba y di eynan bo ta traha riba bo mercado. E problema cu idioma nos ta resolve pa bo si bo laga bo mes wordo guia pa Arubianonan. Aparte di e idioma e Arubiano conoce bon e cultura comercial di paisnan Latino-Americano. Nos como Gobierno tin un netwerk amplio y por yuda boso yega na

e luganan corecto”. Managing Director Rik Krabbendam a bisa cu internamente e ta bay delibera cu e otro nan riba e posibilidad pa haci uzo di e concepto Gateway Aruba.

NACO sigur ta participa na e conferencia ‘Europe meets the Americas’ cu ta wordo teni na Aruba dia 5 te cu 8 di mei. Un conferencia cu ta muestra di bira uno sumamente interesante cu participacion grandi y di hendenan interesante.

Disponibilidad di hendenan local bon studia ta pa NACO di vital importancia. “Aruba tin bastante hende bon studia. Esey ta hustamente e motibo pakico nos ta trahando riba e di tres pilar economico. Den turismo y den sector petrolero no tin bastante trabou cu ta na nan nivel. Cu e desaroyo di un economia di conocimiento nos por crea trabou pa nos profesionalnan hoben, pa asina nan por regresa nan isla,” Eman a bisa. □